

**Uchetemel a Llach**  
**er a Beluu er a**  
**Oreor**

Mlengodech  
er se er a  
iNovember 8, 2005

## BELDEKLEL A TEKOI EL NGAR ER TIANG

Uchelel a Bakes.....	1
I. Kerensel er a beluu er Oreor.....	2
II. Ngar bab el klisiich.....	3
III. Chad er a Oreor.....	
IV. Llemeltir a rechad er a beluu er a Oreor.....	
V. Sengkyo.....	
VI. Omerredel er a beluu er a Oreor.....	
VII. Ngerachel er a orretel a ureor.....	
VIII. Olbiil Era Llach.....	
IX. Tekoi er a udoud.....	
X. Bebil er a kerebil a tekoi.....	
XI. Omeidechel a Uchetemel a Llach.....	
XII. Kerbil a oiuelel a tekoi.....	

## Uchelel a Bakes

Kemam a rechad er a Oreor a mui el  
melebedebek a mla rolam er a rechudel el mei.  
Aki smisiich a klaumerang er kemam er a amt er a  
rechad, el mla er a rechad el kirir a rechad, el  
obengkel a bleketakl el reng el bedul a rokui el  
chad er a beluulechad e ultuil er a rebladek er a  
rechudel, e choba omengull ma duch el reng, e  
ngoikemam ma klengar er kemam ma ngar  
medemam el cheroll ma ungil kerruul el mo er a  
eungel a euotelel a ulekerreuil a Rubak el Dios, e  
kutmeklii e ruii el mo tekoi tia el Uchetemel a  
Llach er a Beluu er a Oreor.

## II. BLIONGEL KERENSEL ER A BELUU ER A OREOR

**Bades 1.** A Beluu er a Oreor a uldimukl er ngii a ingselel ma debel el oltirakl a uldelid el llach.

**Bades 2.** A Oliochel er a Beluu er a Oreor a uaikang:

Ngar er a diluches eng omuchel er a rael Oidesengong el mo er a Ngerchebal el ouelangch er a Merach er a Ngetkib, e ngar isei el mo tuobed er a delongeleelel a Ngcheludel el Imeliik ma Ngcheludel el Kldeu e melemolm er a Toachel Ngermechiuch e melemalt el mo tuobed er a Toi er a Chiul, e ngar isei el mo er a Ched er a Melob, e melemolem el mo er a Uchelbeluu el okiu a delongeleelel a Bab ma Iou el Kiloll, el mo bedul a dimes el ngar er a Uchelbeluu el mo tmurk er a Ngereklime mo er a Oiyaol e okiu a Mesikm el mo er a Bkul Chotuut er a chelmellel a dimes er a Ngemelis e merael el mo bedul a diluches el di merekmo bol turk er a uchelelel. E tia el oliochel er a Beluu er a Oreor a melemolm el mo tuobed el mo bedul a ngoaol el mo tmurk er a teruich ma erung (12) el nautical miles el omuchel er a

kltmokl el olkelelel a beluu el ngar er a ikrel a chelmoll.

**Bades 3.** A ORDOMEL ma dertal NGEREKLDEU er a Beluu er a Oreor a kirir el mangedmokl e omtebechel a uldelid e bleketakl el oliochel er tir.

**Bades 4.** A Beluu er a Oreor a mor ngii a ileakl el klisichel er a rokui el klalo el uldimukl er ngii a ikel ngar ngii a klengar ma diak a klengar er ngii el keruul el ngar er a bertakl, ma eungel a bertakl, ma cheslel a daob ma mechedil a beluu ma melidiul el ngar er a bebul a beluu ma daob, el mo er a teruich ma erung (12) el nautical miles er a cheridil er a beluu el omuchel er a kltmokl el olkelelel el ngar er a ikrel a chelmoll. Ea ikel di mla roleelel a omenged er a irechar el mei el oltirakl a uldelid el llach a di melemolem.

## II. BLIONGEL NGAR BAB EL LLACH

**Bades 1.** Tia el Uchetemel a Llach a kot el ngar bab el llach er a Beluu era Oreor.

**Bades 2.** Ngidil le llach malechub eng omeruul er a Amt er a Beluu er a Oreor el mo kautok ngii me tial el Uchetemel a Llach, a mo diak a klisichel er a di sel ngar ngii a klautok el kirel.

### III. BLIONGEL CHAD ER A OREOR

A mo er a belsachel el kmo ng chad er a Oreor a kirel chad er a Oreor el oltirakl a uldelid el llach er a rechudel el mei, e chad er a Beluu er a Belau.

### IV. BLIONGEL LLEMEL TIR A RECHAD ER A BELUU ER A OREOR

**Bades 1.** A rechad er a Beluu er a Oreor a ngar ngii a mui el llemeltir el oltirakl a uldelid el llemalt ma uchetemel a llemalt el ulecholt er a Uchetemel a Llach er a Beluu er a Belau.

**Bades 2.** A Amt er a Beluu er a Oreor a diak el sebechel el olekebai malechub eng mesuld a omengull ma ngerchelel a klobak ma rulab a dereder el okiu a kmal rolet er a rechudel el mei, alsekum eng diak le kautok ngii me tia el Uchetemel a Llach. E dirrek el diak el sebechel a Amt er a Beluu er a Oreor el mo olekebai omengull el mortir, ma techellir el mo ngmai a dui ma ngerachel er a ngidil dauch er a Amt.

### V. BLIONGEL SENGKYO

A chad er a Beluu er a Belau e chad er a Oreor e kesengil eng teruich ma eai (18) a rekil a sebechel el sengkyo er a Beluu er a Oreor. A Ol-

bill Era Llach er a Beluu er a Oreor a mo oterkeklii a tkul riou el klemengetel a delengcheklel a chad ma omelecheselel a ngakl el kirel a sengkyo er a beluu. A sengkyo er a rechad a mo okiu a berrotel el omeluches.

### VI. BLIONGEL OMERREDEL LOLTIRAKL A ULDELID EL LLACH ER A BELUU ER A OREOR

**Bades 1.** A Blai Era Klobak, el ngar ngii a re Ngarameketii ma Rubekulkideu, a obang a tkul rebab el omerredel er a Beluu er a Oreor el kirel a rokui el tekoi ra uldelid el llach. A beldeklel a Klobak ma blechebechel a ngerchelir ma urrerir a oltirakl a uldelid el llach. A ileakl el blai el kirir a redil el omtechei er ngii a Bilung ma Mirair a Blai Era Re Kerengab. A rokui el tekoi er a kredil a mo meues er tia el Blai loltirakl a uldelid el llach. A Blai Era Re Kerengab a diak lolib ma diak loltaut a llach, eng di sebechel el olengeseu er a Blai Era Klobak el okiu a uldelid el llach.

**Bades 2.** A omerredelel a ngerchelel a Blai Era Klobak a mui el melemolem, el uldimukl er ngii a ikal beldukl er iou:

(1) Ng sebechel el otebedii el mo er a Olbiil Era Llach a ngidil uldasu el mo llach;

(2) Ng oltirakl a uldelid el llach eng mo omtechei er a Beluu er a

Oreor el mengedecheduch el obengkel a ngidil chelechad, el uldimukl er ngii a bebil er a beluu ma Amt er a Beluu er a Belau ma ngodech el beluu;

(3) Ng mo omekrael ra Governor er a tekoi el kirel a uldelid el llach ma orolel el mor tial Uchetemel a Llach ma llach ra Beluu er a Oreor;

(4) Ng mo kongei a ngidil klou el telbiil el ulsiseb er ngii a Amt er a Beluu er a Oreor el kirel a uldelid el llach;

(5) Ng mo melutk er a re mo obengkel el oureor e meketakl a urrerir e mo udeudel el oltirakl a llach; ma

(6) Ng mo melelem a ngerchelel el ngar eungel a uldelid el llach ma teletael ma kuk bebil er a urerel el mo mocholt er a llach.

**Bades 3.** A ududir a rechedal a Blai Era Klobak a mo mekedmukl el oltirakl a llach.

**Bades 4.** A Blai Era Klobak a mo kldibel er a belsechel le tibir malechub eng oltirakl era ongtil a Governor.

## VII. BLIONGEL NGERACHEL ER A ORRETEL A UREOR

**Bades 1.** A ngerachel el kirel a orretel a ureor er a Amt er a Beluu er a Oreor a mo er a imal a Governor ma rechad el ngara eungel el bo lolutk er tir el oltirakl er a uldesuel el lobengkel a kengei er a Olbiil Era Llach, el mo medal a mo mukdubech el kakerous el meklou el blingelel a ureor er a Amt.

**Bades 2.** A Governor a bol sengkyo er ngii a rechad er a chesl a klou el sengkyo er a Beluu er a Oreor. A kisel a kingellel a cheual (4) rak. A chad el sebechel mo Governor a (1) chad ra Beluu er a Oreor e sengkyo er a Oreor; (2) kesengil eng okedei (30) a rekil; e (3) mla kiei er a Oreor el kesengil eng erul (2) rak er uchei er a sengkyo. Ngdiak a chad el mo betok er a edei (3) el cheliloil a kisel er tial el kingall.

**Bades 3.** Ng mo mukdubech a meklou el blingelel a ureor er a Amt el oltirakl a llach.

**Bades 4.** A ngerchelel a Governor a mo uldimukl er ngii a ikal beldukl er iou:

(1) Melisiich e oltaut a llach er a Amt er a Beluu er a Oreor;

(2) Oltobed a udoud el oltirakl a llach; melai a tax ma bebil er a udoud el me soiseb el okiu a kuk ngodech el roel el ngii a muk-

dubech el oltiraki a llach;

(3) Mengetmoki er a yosan-an er a Amt er a Beluu er a Oreor, e otebedii el mo er a Olbiil Era Llach meng mo ketmekill el mo llach;

(4) Mol siseb er a rechad el mo oureor el ngar eungel, e mo mengedereder er tir er a rolet a urrerir; e

(5) Ng mo kongei er a chesel a teruich (10) el klebesei, ea lak el kengei eng oluut el mora Olbiil Era Llach el luut el bol lorritel a rokui el uldasu el mo llach er a uriul er a ongeru el omengiuel; e mo kudmoki a bebil er omeruul el lekengei er ngii a VIII Bliongel, ra Bades 9, er tial Uchetemel a Llach;

(6) A Governor a sebechel el ngosengesii a ngiidil ildois ra udoud, malechub eng mo smuld a dertal tekoi (line item veto) ra ngiidil llechul otebedel a udoud er a uriul er a ongedei el omengiuel era Olbiil Era Llach. A ngiidil omengesadel malechub eng omeseldel a dertal tekoi (line item veto) ra chesel a uldasu el mo llach a mo mokodongii a Olbiil Era Llach el

mo kldibel el mo oureor el kirel a omelaul er omengesadel malechub eng omeseldel a dertal tekoi (line item veto);

(7) A Governor a sebechel el mo mengedecheduch el kirel e kongei a ngiidil klou el telbiil ma konterat, el lebol kengei Olbiil Era Llach; e

(8) Mengetmoki e bebil er a ureor ma ngerachel el mo mukdubech el oltiraki a llach.

**Bades 5.** Alsekum a kingellel a Governor a mo bechachau eleng mloiis, ng mlad, ng ulelturk el mo merek, malechub eng kuk di ngodech a uchul eng mlo merek el oureor, ea le medechel a betok er a dart ma okai (180) el klebesei er a kisel ngikal chad er a kingall er a uchei er sel mei el klou el sengkyo, eng mo er ngii a ileaki el sengkyo er a di chesel a okedei (30) el klebesei er a bol bechachau tial el kingall el mo melilt er a techil ngikal chad el di mo melemolm a ikel medechel kisel er a di chesel a okolem (60) el klebesei. Engdi alsekum me tia el kingall a di merokol bechachau er a chesel a dart ma okai (180) el klebesei er a uchei er sel mei el klou el sengkyo ea Blai Era Klobak a mo tutkii a mo oungerachel er tia el kingall el di mo melemedem a ikel medechel el kisel. A di chesel a teloched el dibus a Governor, malechub eng diak el sebechel kudmoki a urerel, eng mo mesiik a techil el oltiraki a teletael el mo moterkoki er a llach.

**Bades 6.** A re sengkyo el chad a sebechir el nguu a Governor er a kingall el oltirakl a llach. A Governor a diak el sebechel el mengai er a kingall era chelsel a kot el rak er ngii.

**Bades 7.** A Governor ma remo oungerachel a bekl meklou el blingelel a ureor er a Amt a mo udeudel el okiu a llach.

## VIII. BLIONGEL OLBIIL ERA LLACH

**Bades 1.** A ngerachel er a omelib el llach a ngar er a Olbiil Era Llach er a Beluu er a Oreor.

**Bades 2.** A rechedal a Olbiil Era Llach a morngii a dertal mengilt er a dertal renged ma hang (hamlets) er a Beluu er a Oreor mar teim (5) el mengilt er a chelsel Oreor el rokir (at large).

**Bades 3.** A klsir a rechedal a Olbiil Era Llach a mo cheual (4) rak.

**Bades 4.** A chad er a Oreor el ngii a llechukl a ngklel el sengkyo er a Beluu er Oreor, e kesengil eng lluich ma eim (25) a rekil, ma delengcheklel a ngar er a Beluu er a Oreor el mla mo erung (2) el rak er a uchei er a sengkyo, a sebechel mo chedal a Olbiil Era Llach.

**Bades 5.** A ududir a rechedal a Olbiil Era Llach a mo mekedmokl el okiu a llach. Ng diak a

ngesecheklel a ududir a rechedal a Olbiil Era Llach el di tir el ruii er a chelsel a klsel a urelir malechub eng delongelel a klou el sengkyo ma kot el klsel ongdibel er a Olbiil Era Llach.

**Bades 6.** A Olbiil Era Llach a mor ngii a ikal beldukl er iou el klisichel ma urrelel, el mo oltirakl a llach ma Uchetemel a Llach er a Beluu er a Belau:

(1) Ng mo olterkokl a omeliul a tax ma bebil er a sisebel a udoud;

(2) Ng mo olterkokl a bedil a udoud el oba ngklel a Amt er a Beluu er a Oreor el mangedmokl a ureor beluu ma okerulel a kerruul e mengkad a belsel a beluu;

(3) Ng mo smisiich a telbiil er a beluu el kirel a meklou el tekoi beluu el okiu a sengkyo er a rubdois er a rechedal;

(4) Ng mo mangedmokl a urerel a budech ma klungiaol ma ulekerreu el kirir a rechad er a Beluu er a Oreor;

(5) Ng mo melib a ngidil le llach el ngar ngii a ultutelel e ungil el kirel a omengedmeklel a ngerachel el beldukl er tiang malechub eng ulecholt er tia el Uchetemel a Llach

malechub eng Uchetemel a Llach er a Beluu er a Belau;

(6) Mol siseb er a rechad el mo oureor el ngar eungel e mo mengedereder er tir er a rolet a urrerir e temo udeudel el oltirakl a llach; e

(7) Sebechel el eulii (override) a otngeklel (veto) a Governor er a ngidil uldasu el mo llach ma lechub eng eulii a ngidil omeseldel a dertal tekoi (line item veto) ma lechub eng ongesengesel a yosang el okiu a eru-er-edei-tiud (2/3) el sengkyo er a chelsel a teruich (10) el klebesei er uriul er sel sils er a le motngakl (veto), malechub eng milsuld a dertal tekoi ra chelsel (line item veto) ma lechub eng omengesadel ra yosang.

**Bades 7.** A rechedal a Olbiil Era Llach a mo ngiltii a mo Melkingel Olbiil Era Llach ma rebebil e ra rulab a deruchall el mo moterkokl el okiu a sengkyo er a rubdois er a rechedal.

**Bades 8.** A Olbiil Era Llach a kot el mo mekideb er a ongedei Longeim Lurreor er a Kot el Buil er a uriul er a klou el sengkyo er a Beluu er a Oreor. A uriul el klsel ongdibel a mo moterkokl el okiu a llach. E dirrek el Olbiil Era Llach a sebe-

chel el mo mokedong el mo mekideb er a ngodech el belsechel el okiu a okodongel a Blai Era Klobak, malechub e ngikel Melkingel a Olbiil Era Llach malechub eng oltirakl a llechukl el ongit er a rubdois er a rechedal.

**Bades 9.** A Olbiil Era Llach a diak el sebechel el tibir a llach a lak el okiu a uldasu el mo llach. A rokui el uldasu el mo llach a mor ngii a uchelel el kmo: **"A RECHAD ERA OREOR EL OKIU A RUMTECHEI ER TIR EL NGAR OLBIIIL ER A LLACH ER A BELUU ER A OREOR A OTERKEKLII EL KMO:"**. A bekl uldasu el mo llach a kirel el uchei eng mengai er a erung el kakerous el omengiuel el okiu a sengkyo er a rubdois er a rechedal a Olbiil Era Llach. A uriur er ongeru el omengiuel e a Olbiil Era Llach a odureklii a uldasu el mo llach el mo er a Governor. A uldasu el mo llach a mo llach er a chelsel a teruich (10) el klebesei er a uriul er a lodureklii el mor er a Governor; a le mlak le kengei er ngii ma lechub a le mlak el oltii a Governor, ma lechub eng mla moterkokl el mo llach er uchei el okiu a kengei ra Governor. A uldasu el mo llach a di ta el moluut el mo meteriter. A bo el orritel er a uriul er a el moluut e a Olbiil Era Llach a sebechel el di chelsel a teruich (10) el klebesei e ng mo sengkyo el chemoit ma lechub e ngmai el rokui a ikel tekoi el ulbengkel, ma lechub e ng di ngmilt a lolai er ngii el mo soiseb er a uldasu el mo llach e mo er a ongedel omengiuel. Alsekum eng mengai eng modurokl el mora Governor. E a chelsel a teruich (10) el klebesei e a Governor a sebechel el kongei



ma lechub eng otngeklii (veto) a ngii dil luldasu el mo llach malechub e ngosonges a ildisel a udoud ma lechub eng smuld a derstal tekoi (line item veto) ra ildois ra udoud el ngara llechul a omengitel a udoud. E a uriur ra ngidil otngakl, ma lechub eng ongesengesel a ildois ra udoud ma lechub eng omeseldel a dertal tekoi (line item veto), e a Olbiil Era Llach a ngar ngii a teruich (10) el klebesei el longedmokl er a omelaul er tial otngakl (veto). A motngakl (vetoed) el uldasu el mo llach a di mo llach sel le meaul.

**Bades 10.** A Olbiil Era Llach a sebechel el sumecheklii a chedal al ngar ngii a telemellel, e sebechel nguu a klisichel a chedal el telkib el taem el kirel sel telemellel, e sebechel el oisur a chedal el okiu a sengkyo el kesengil eng erung er a edei-tiud (2/3) er a rubdois er a rechedal, el kirel a telemellel el uldimukl er ngii a oterul a beluu, malechub eng mlo char malechub eng bebil er a oberoed e meklou el tellemall.

**Bades 11.** A rechad er a beluu el sengkyo a sebechir el orbetii a mlengilt el chad er a kingellel er a Olbiil Era Llach el oltirakl a llach. Ng diak a chad er a Olbiil Era Llach el morebet er a kingellel er a chelsel sel kot el rak er ngii.

**Bades 12.** Alsekum a kingellel a chedal Olbiil Era Llach a mo bechachau eleng mlerebet, ng mlois, ng mlad, ng ulelturk el mo merek, malechub e ngar ngii a uchul eng mlo diak el sebechel el oureor, e medechel a betok er a dart ma

okai (180) el klebesei er a klsel ngikal chad er a kingellel, eng mor ngii a ileakl el sengkyo er a di chelsel a okouang ma eim (45) el klebesei er a bol bechachau tia el kingall, el mo melilt er a techil ngikal chad el di mo melemedem a ikel medechel el klsel. Alsekum ngesonges er a dart ma okai (180) el klebesei a medechel el klsel ngikal chad e sel kingall a di medechel el di bechachau.

**Bades 13.** Ng diak a chedal Olbiil Era Llach el mo kerioil el kirel a ngidil tekoi el meldung er a chelsel Olbiil Era Llach. A tal chedal Olbiil Era Llach a diak bol mudechem er a chelsel omerolel el mong ma luut er ngii er a ong-dibel er a Olbiil Era Llach, engdi sebechel mudechem el kirel a oterul a beluu ma oberoed e meklou el tellemall malechub eng temellel a budech.

## IX. BLIONGEL TEKOI ER A UDOUD

**Bades 1.** Ng mo mekedmokl a omsangel er a udoud buai er a Amt er a Beluu er a Oreor. A rokui el udoud el soiseb el okiu a tax ma kuk di ngodech el rolel a mo medechel er a omsangel er a udoud buai er a Amt er a Beluu er a Oreor.

**Bades 2.** Ng diak a udoud el sebechel el mo motobed er a omsangel er a udoud buai er a Amt er a Beluu er a Oreor a lak el oltirakl a llach.

**Bades 3.** Ng mor ngii el kesengil eng tang

er a tal rak a osengel ma omerrittel a sisebel ma tebedel a udoud buai er a Amt er a Beluu er a Oreor el oltirakl a llach.

**Bades 4.** Ng diak a uldasu el mo llach el oltobed a udoud el sebechel mo llach alsekum eng dirkak el bol le llach a cherrengellel a yosan-an era Amt er a Beluu er a Oreor. Sel loruul er a yosan-an el mo llach, ea Olbiil Era Llach er a Beluu er a Oreor a sebechel el meruul a omeldechel a cherengelel a yosan-an el oltobed er ngii er a bekl rak a Governor.

**Bades 5.** Alsekum a Amt er a Beluu er a Oreor a melib er a llach el omdois malechub eng melechel a tax el mo kirel a meklou el ruoll el ureor er a buai eng kirel kot eng mo ouchais er a buai er a bleketakl el uchul ma cheral sel mo klou el ketmekill er a buai. A ouaisei le llach a di ngii el mo mesuld er a uriul er a le meketmokl el me cherrungel malechub eng mechoit sel mle kirel kedmekill.

## X. BLIONGEL BEBIL ER A KERBIL A TEKOI

**Bades 1.** Tia el Uchetemel a Llach a llechukl el tekoi er a Belau e mo moiuid el mo tekoi er a English. Ale bor ngii a klautok er a ikang el cherung el tekoi ea tekoi er a Belau a mo motirakl.

**Bades 2.** Ng diak a kloklir a dertal chad el

mo mengai el kirel a buai a lak a melemalt el omesodel ma ungil cheral.

**Bades 3.** A Amt er a Beluu er a Oreor a mo meruul a ikel rokui el meklou a ultutelel el okedmeklel a omesuub ma ukeruul el mo klungi-olel a klengar er a rokui el chad el ngar er a Beluu er a Oreor.

**Bades 4.** A Amt er a Beluu er a Oreor a mo oluut el mo er tirkel dimla ouklalou malechub eng tirkel kirir el chad a ngidil chutem el mlengai el mo telkib er a chutem buai el le ngilai a ikel amt malechub ete chad er a ngodech el beluu el mla er a Belau er a ngar er a mong el okiu orimel, mesiich el omeruul, cheleblad malechub eng mengai el dimlak a melemalt el cheral malechub eng ungil el omesodel, el oltirakl a llach ma Uchetemel a Llach er a Beluu er a Belau.

**Bades 5.** Ng diak el bor ngii a tax er a chutem.

**Bades 6.** Ng diak el bor ngii a tax er a be-  
dengel a tal chad (head tax).

**Bades 7.** A Amt er a Beluu er a Oreor a mengull e omdid a mla deleuill er a irechar el mei er ngii ma bebil er a beluu er a Belau.

## XI. BLIONGEL OMELDECHEL A UCHETEMEL A LLACH

**Bades 1.** Ngidil omeldechel tial el Uchetemel a Llach a sebecchel muuchel el okiu a rechad er a beluu el di tir el mechelii, ma lechub eng Olbiil Era Llach el uaikakid a blekerdelel:

(1) okiu ongit el obengkel a saing er a kesengil eng lluich ma eim el basent (25%) er tirkel lechukl a ngklir el sebecchir el sengkyo; malechub eng

(2) okiu a ulecholt el ongit el le kengei er ngii a kesengil eng edei er a eua-itiud (3/4) er a rechedal a Olbiil Era Llach er a Beluu er a Oreor.

**Bades 2.** Ngidil uldasu er a omeldechel tia el Uchetemel a Llach a mo tekoi alsekum mete kongeii er ngii er sel klou el sengkyo er a beluu a rubdois er a ildisir a rechad el mlo sengkyo.

**Bades 3.** A uldelid el llach ma uldelid el llemalt a sebecchel el mo mengodech el okiu a uldelid el llach er a Beluu er a Oreor.

## XII. BLIONGEL KERBIL A OIUELEL A TEKOI

**Bades 1.** Tial el Uchetemel a Llach a mo omuchel a klisichel er a Lluich ma Tal Kebesengil

Ongetruich el Buil er a Tal Telael ma Etiu el Dart ma Okai ma Edei el Rak (1983).

**Bades 2.** A ikel rokui el llach el ngar ngii a klisichel e oureor er a chelsel a Beluu er a Oreor er a uchei er sel sils el bol omuchel a klisichel tia el Uchetemel a Llach el ngii a oltiraki a bades er tia el Uchetemel a Llach a di melemolem el ngar ngii a klisichel e oureor el di merekmo bol le mutechei, le mesuld, le mengodech malechub eng di ngii el mo diak a klisichel.

**Bades 3.** Ng morngii a klou el sengkyo er a Beluu er a Oreor er a Ongerung el Ureor el Teruich ma Ta el Kebesengil a Ongeteruich ma Ta el Buil er a 1997, ea uriul er isei e ng bek el cheual rak er a ongerung el Ongerung el Ureor er a Ongeteruich ma Tal el Buil. Omellemir a re mlengilt el mo er a kingall a morngii er a sueleb er sel ongerung el Ongerung el Ureor er a Kot el Buil er uriur er a sengkyo. A rengara kingall a melemolem el oureor el mo lmuut er a sueleb er a Teruich ma Edei el Kebesengil a Kot el Buil er a 1998.